

## Headlines

- 1 गृहमंत्री अमित शाह होरें आकखेआ ऐ जे सरकारै पिछले 9वें ब'रे दरान जम्मू कश्मीर च सुरक्षा हालात च कामयाबी कन्नै सुधार कीता ऐ।
- 2 केन्द्री मंत्री नितिन गडकरी होरें आकखेआ ऐ जे सरकार जम्मू कश्मीर च जरनैली शिड़कै सरबंधी बेजोड़ ढांचा उपलब्ध करोआने, खित्ते दे आर्थिक विकास गी बढ़ावा देने ते प्रदेश गी सेलसफा आली इक बेहतरनी थाहर बनाने लेई वचनबद्ध ऐ।
- 3 उपराज्यपाल मनोज सिन्हा होरें आकखेआ ऐ जे सरकार जंगली जीव जैन्तुएं दे संरक्षण ते राकखी हिफाजत सनें आर्थिक विकास गी बढ़ावा देने ते उचित संतुलन राएं पर्यावरण दी सांभ-संभाल लेई वचनें बज्जी दी ऐ।
- 4 5एं दिनें तोड़ी चलने आला संगम-2023 नां दा युवा उत्सव भद्रवाह च शुरू होई गेआ ऐ।

<><><><><><>

## HM-JK

गृहमंत्री अमित शाह होरें अज्ज आकखेआ ऐ जे पिछले 9वें ब'रें च मोदी सरकारै जम्मू कश्मीर सनें गड़बड़ी आली होरने थाहरें कन्नू-बवस्था दी स्थिति च कामयाबी कन्नै सुधार कीता ऐ। उनें आकखेआ.....बाईट देहरादून च 49मीं कुल भारती पुलस विज्ञान कांग्रेस गी संबोधन करदे होई गृह मंत्री होरें आकखेआ जे कोई बी मुख्य उसलै तगर तरक्की नेई करी सकदा जिसलै तगर ओहदे बन्न ते अंदरूनी सुरक्षा बेहतर नेई होंदी। उनें आकखेआ जे कन्नू बवस्था दी स्थिति बेहतर होने पर गै विकास मुमकन होई सकदा ऐ।

<><><><><><>

## Conference Terror

राष्ट्री जसंच अजेंसी एनआईए पाससेआ नमीं दिलली च आयोजित आतंकवाद-रोधी दऊं ध्याड़ें दा सम्मेलन संपन्न होई गेआ ऐ। इस मौके एनआईए दस्ते ते युनिटे आतंकवादी खतरें दा मकाबला करने लेई आपसी तालमेल होर बधाने दा प्रण पाया ऐ। सम्मेलन च हिस्सा लैने आले डेलीगेटें, मुख्ये च आतंकवादी तंत्र गी भलेआं खत्म करने ते आतंकवादी गतिविधिएं लेई जारी होने आले रपे-पैसे पर रोक लाने सरबंधी बक्ख-बक्ख मामलें पर बचार बटांदरा कीता। सम्मेलन दे समापन सत्र दी प्रधानता करदे होई केन्द्री गृह सचिव अजय कुमार भल्ला होरें आतंकवादी ढांचे गी खत्म करने लेई केन्द्र ते राज्यें दिएं अजेंसिएं बश्कार तालमेल ते ठोस जतनें दी जरूरतै पर लोड़ पाई। उनें आतंकवाद खलाफ लड़ाई च केन्द्र ते राज्यें दिएं अजेंसिएं गी इक मुमकन मदाद देने दा भरोसा बी दोआया ऐ।

<><><><><><>

## BSF-Passing Prade

बीएसएफ दे हुमहामा बडगाम आले सब्सिडायरी सिखलाई केन्द्र च कांस्टेबल बैच दी पासिंग आउट परेड दा सरिस्ता कीता गेआ जेहदे च 115 रंगरूट कांस्टेबलें गी बीएसएफ च शामिल कीता गेआ। बीएसएफ दी कश्मीर फ्रंटियर दे आईजी अशोक यादव होर कार्यक्रम दे मुख् परौहने हे। उनें बक्ख-बक्ख गतिविधिएं च शानदार प्रदर्शन करने आले रंगरूटें गी तगमे भेंट कीते। 24एं हफते दी अवधि आली इस सख्त सिखलाई दरान इनें रंगरूटें गी बक्ख-बक्ख थेआर चलाने ते होरने सरबंधत जानकारियां दित्तियां गेइयां।

<><><><><><>

## Gadkari-JK

शिड़क ट्रांसपोर्ट ते जरनैली शिड़कें सरबंधी मैहकमे दे केन्द्री मंत्री नितिन गडकरी होरें आकखेआ ऐ जे जम्मू कश्मीर च मैरोग सुरंग कोल ढाई सौ मीटर लम्मा पुल बनियै तैआर होई गेदा ऐ। एहदे पर 82 करोड़ रपे दी लागत दा अनुमान ऐ। एहदे कन्नै श्रीनगर-जम्मू राष्ट्रीय जरनैली शिड़का पर यात्रा दे समें च कमी औग ते ढलान दे खतरे आले इलाकें थमां बचाह होग। सोशल मीडिया पर कीती गेदी इक पोस्ट च उनें आकखेआ जे एह ढांचा जरनैली शिड़का पर रामबन कोला लेइयै बनिहाल आले सैक्शन उप्पर ऐ। 645 मीटर लम्मा हिस्सा बड्डी परियोजना दा हिस्सा ऐ जेहड़ा ना छड़ा यात्रा दे फासले गी 200 मीटर तोड़ी घटाई देग सगुआं इक वैकलपक रस्ते गी उपलब्ध कराग। उनें आकखेआ जे सरकार जम्मू कश्मीर च खास जरनैली शिड़कै आला ढांचा तैआर करने आले अपने धेइयै पर कम्म करा करदी ऐ। बदलाव आनने आले इस विकास कन्नै ना छड़ा इलाके दी आर्थिक तरक्की च जोगदान होग, कन्नै सैलसफा दे मुख् केन्द्र दे तौर पर बी बाद्धा होग।

<><><><><><>

## LG-Wildlife

उपराज्यपाल मनोज सिन्हा होरें जैव बन्न-सबन्नता ते जंगली जीव जैन्तुएं दी हिफाजत लेई समुदाय आस्सेआ अगुवाई कीते जाने दा आह्वान कीता ऐ। उनें आकखेआ जे पर्यावरण सरबंधी सरिस्ते गी तगड़ा करना,साढ़ी नदिएं ते झीलें दी असल शान गी ब्हाल करना, तस्करें ते शकारिएं थमां साढ़े जंगलें दी हिफाजत करना साढ़े सामूहिक जिम्मेवारी ऐ। उपराज्यपाल होरें अज्ज श्रीनगर च वाल्क फॉर वाईल्ड लाईफ वॉकथॉन गी झंडी दस्सियै रवाना कीता। एह द्रौड़ जंगली जीवम दी हिफाजत सरबंधी मनाए जा करदे 2023 आले हफते दा हिस्सा ही। एह द्रौड़ पुलस गोल्फ कोर्स कोला लेइयै निशात बाग तोड़ी लाई गेई। जंगली-जीव-जैन्तुएं दी हिफाजत आले

मैहकमे आस्सेआ जंगली जीवेम दी हिफाजत गी लेइयै जागरूकता पैदा करने लेई इस द्रौड़ दा आयोजन कीता गेदा हा। एह्दे च प्रमुख नागरिकें,जंगली जीवेम दी हिफाजत ते पर्यावरण सरबंधी क्लब दे मिंबर, स्वयंसेवी एनसीसी दे कैंडेट ते बड़ी मती गिनतरी च विद्यार्थी शामिल होए दे हे। उपराज्यपाल होरें जंगली जीव-जैन्तुएं दे रौहने आली थाहरें दे एकीकृत विकास लेई केन्द्री शासत प्रदेश दे प्रशासन आस्सेआ कीती गेदी कोशशें दी जानकारी सांझा कीती। उनें पर्यावरण मुआफक सेलसफा ते अर्थ-बवस्था गी बढ़ावा देने सरबंधी कीती गेदी कोशशें बारे बी दस्सेआ।

<><><><><><>

### Youth Festival

भारती फौज दी राश्ट्री राइफलज यूनिट पास्सेआ यूनिवर्सिटी कैंपस भद्रवाह दे सैहयोग कन्नै भद्रवाह च संगम-2023 नां दे इक युवा उत्सव दा सरिस्ता कीता जा करदा ऐ। 5एं ध्याड़े दे इस कार्यक्रम दा अज्ज उदघाटन कीता गेआ ते एह्दा मकसद राश्ट्र दी मुखधारा कन्नै जुड़ने लेई नोजवानें दा दिल बधाना ऐ तां जे ओह् खित्ते च रमानदारी, खुशहाली ते विकास दा सनेहा सब्बनें तोड़ी पजाई सकन। राश्ट्री राइफलज दी 9 सेक्टर दे कमांडर ब्रिगेडियर समीर पलंदे होर उदघाटनी समारोह दे मुख पररौहने जिसलै के डोडा दे डिप्टी कमीशनर विशेष पाल महाजन होर मानजोग पररौहने हे। समारोह दे उदघाटन दे मौके पर बड़ी बद्ध गिनतरी च आम लोक ते फौज दे अफसर ते जवान बी मजूद हे। प्रदेश दे 20एं कालेजें ते जम्मू यूनिवर्सिटी दे सब्बनें 7एं कैंपसें दे 500 शा मते विद्यार्थी हिस्सा लै करदे न।

<><><><><><>

### CRPF-Women

सीआरपीएफ महिलाएं दा मोटर सैकल अभियान 2023 ऐल्ले जम्मू च ऐ ते सीआरपीएफ दी 76 बटालियन आस्सेआ कमांडेंट तारिक हुसैन खान हुंदी अगुवाई तैह्त् सतवारी जम्मू आले सरकारी हायर सकेंडरी स्कूल च इक सुआगत समारोह दा सरिस्ता कीता गेआ। सीआरपीएफ दिएं महिला मोटर सैकल सुआरें दा एह् अभियान इस म्हीने दी 3 तरीक गी लाल चौक श्रीनगर थमां शुरू होआ हा। अज्जै दे कार्यक्रम दे मुख पररौहने साबका उपमुखमन्त्री ते भाजपा नेता कविंदर गुप्ता होर हे ते उनें इस अभियान कन्नै जुड़ी दिएं सब्बनें महिलाएं दा सुआगत कीता ते उनेंगी मुबारकबाद बी दित्ती। उनें आक्खेआ जे सीआरपीएफ दा इतिहास म्हेशां शानदार रेआ ऐ ते इस बल दे नं छड़े मर्दे सगुआं महिलाएं बी देशै दे हर कोने च अपनी जिम्मेदारी पूरी निष्ठा कन्नै नभाई ऐ।

<><><><><><>

### Accident

डोडा जिले च जंदी रातीं होए दे इक शिड़क हादसे च 3 लोकें दी मौत होई गई ते 5 जनें घायल होई गे। एह् हादसा खलैनी-मरमत शिड़कै पर उसलै पेश आया जिसलै गोहा जा करदी इक गड्डी हम्बल ग्रां दे नेड़े शिड़कै थमां रूलकियै हेठ इक नाले च जाई डिग्गी। हादसे दे तुरत मगरा मकामी लोकें ते पुलस दे जवानें मौके पर पुज्जियै बचाह अभियान शुरू करी दित्ता। हादसे दे बेल्लै गड्डी च कुल 8 लोक सुआर हे। सब्बनें जख्मिएं गी डोडा अस्पताल मुंतकिल कीता गेआ ते उंदी हालत खतरें शा बाहर दस्सी जा करदी ऐ। डोडा दे जिला विकास कमीशनर होरें प्रभावतें लेई माली सहायता दा ऐलान कीता ऐ।

<><><><><><>

### Krishi Mahotsav

संकल्प सप्ताह दे हिस्से दे तौर पर विकास दी तांग रखने आले मनकोअ ब्लाक च अज्ज कृषि महोत्सव विषय पर केई सारे प्रोग्राम लोआए गे। पुंछ दे डिप्टी कमीशनर यासीन एम.वौधरी होरें बलनोई च लग्गे दे कार्यक्रम दी प्रधानता कीती। मेले दरान करसानें दे फायदे बारे बक्ख-बक्ख सरकारी योजनाएं, राई-बाई सरबंधी नमीं तकनीकें, पर्यावरण मुआफक पिरतें, गोबरधन मुत्तलक जागरूकता प्रोग्राम ते जैव राई-बाई सरबंधी स्रोतें दे स्टाल लोआए गेदे हे। एह् प्रोग्राम टिकाऊ सरिस्ते लेई वैकल्पिक राई-बाई सरबंधी प्रणाली आली योजना तैह्त् लोआया गेदा हा। एह् केपेक्स-एचएडीपी दा हिस्सा ऐ। एह्दे च करसान, लोकें दे नुमांयदे, बीडीसी, डीडीसी ते राई-बाई ते मुत्तलका मैहकमे दे नमांयदे शामिल होए हे।

<><><><><><>

### Lok Adalat

कटुआ च प्रिंसिपल ते सैशन जज अशोक कुमार शवन होरें जिला अदालत दे अहाते च इक खास लोक अदालत लोआई। इस मौके पर केई सारे याचिकाकर्ता अपनी याचिका दा तुर्त नबेड़ा कराने लेई मजूद हे। कटुआ दे प्रिंसिपल सैशन जज होरें दस्सेआ जे तकरीबन 580 मामले अज्ज सुनवाई लेई सूचिबद्ध कीते गेदे हे। उनें आक्खेआ जे इस चाल्ली दियां लोक अदालतां ना छड़ा मुकदमा दर्ज कराने आलें गी तुर्त राह्त पजांगल, एह्दे कन्नै उंदे पैहे ते समें दी बी बचत होग ते योग्य वकीलें दे मार्गदर्शन ते दखल कन्नै अदालतें दे कम्में दा भार बी हल्का होग।

<><><><><><>

### Sports

उधमपुर च अज्जै थमां सब-जूनियर, कैंडेट, जूनियर ते सीनियर श्रेणी च दऊं दिनें दी त्रीह जिला कराटें प्रतियोगिता शुरू होई। एह्दा सरिस्ता जिला उधमपुर दी कराटे एसोसिएशन पास्सेआ कीता जा करदा ऐ जेह्डी जम्मू कश्मीर दी एमैच्योर कराटे डू एसोसिएशन कन्नै सरबंधत ऐ। बक्ख-बक्ख स्कूलें ते कराटे क्लबें थमां 300 शा मते खडारी एह्दे च हिस्सा लै करदे न।

<><><><><><>